

TEZAUUR LITURGIC
14 OCTOMBRIE

ACATISTUL
SF. CUVIOS
NICOLAE
SVIATOȘA
DE LA
PECERSKA



MOSCOVA, 2000



Акафист преподобному Николе Святоше, князю Черниговскому, Печерскому чудотворцу

Кондак 1

Избранному от рода княжескаго и венцем от Царя Царствующих увенчанному, преподобному Николе песнь днесъ воспети дерзаем и, величающе сего подвиги и смирение, со умилением воспеваем: Радуйся, отче наш Николо, светом святости нас присно озаряющий.

Икос 1

Ангелом сомолитвенниче и собору святых сопричастниче, преподобне отче наш Николо, волею отчий престол оставивший и ризы равноангельнаго жития приявый, днесъ похвалу ти принести дерзаем и, на молитвы твоя уповающее, умильно взываем:
Радуйся, отче наш всеблаженный;
радуйся, наставниче наш премудрый.
Радуйся, ангелом сомолитвенниче;
радуйся, собору святых сопричастниче.
Радуйся, яко молитвами твоими исцеления нам подаются;

радуйся, яко предстательством твоим благодать
изливается.

Радуйся, Печерския обители украшение;
радуйся, земли наша утверждение.

Радуйся, отче наш Николо, светом святости нас
присно озаряющий.

Кондак 2

Видяще благочестивое житие родителей твоих,
потщался еси сих добродетелем подражати, и
совокупил еси благородству благочестие, Богу
непрестанно молитву вознося: Аллилуиа.

Икос 2

Разум имуще благодатию Божией
просвещенный, отринул еси суемудрие века сего
и отвратился еси селений грешничих, возлюбил
же еси благолепие дома Божия и место селение
славы Его. Сего ради приими от нас похвалы
сия:

Радуйся, святое прозябение корене
благочестиваго;
радуйся, дивный цвете вертограда
благоуханнаго.

Радуйся, грозде всесладкий Лозы Благоплодная;
радуйся, праведных родителей отрасль
пречестная.

Радуйся, от юности во благочестии

воспитанный;
радуйся, на путь доброделания измлада
наставленный.
Радуйся, всех нас ко спасению наставляющий;
радуйся, от стезей греха нас всемошно
отвращающий.
Радуйся, отче наш Николо, светом святости нас
присно озаряющий.

Кондак 3

Силою Божественною укрепляем, возмогл еси,
преподобне, козни лукаваго попрали и
добродетельми украситися всесветло, Господу
присно работая и Ему усердно
взывающе: Аллилуиа.

Икос 3

Имуще всяческая благая мирская, отринул еси
вся, Единого Благаго возлюбивше и Сему
служити восхотевши. Темже устремился еси во
дворы Дому Господня, в селение славы Его, и на
горах печерских возсиял еси светом
добродетелей, сего ради пении сицевыми
ублажаешься:
Радуйся, мира суету и страстей течение
отринувый;
радуйся, чистоту и богомыслие паче всяческих
возлюбивый.

Радуйся, всесильною Десницею Господней
укрепляемый;
радуйся, светом лица Божия выну озаряемый.
Радуйся, благодатию Господнею осененный;
радуйся, Божиих дарований исполненный.
Радуйся, светильниче, огнем добродетели
возженный;
радуйся, подвигами благочестия
преукрашенный.
Радуйся, отче наш Николо, светом святости нас
присно озаряющий.

Кондак 4

Бурю страстей утишил еси отче, молитвою
твоею всемошною и потопил еси, яко
египтянины, искушения и соблазны в море слез
твоих, егда предстояще пред Лицем Господним о
всем мире ходатайствовал еси и непрестанно
взывал еси Господу: Аллилуиа.

Икос 4

Слышати восхотел еси глаголы ангельския
неизреченныя, ихже не лествь суть языком
человеческим глаголати, удалился еси
многомятежнаго мира и Господу прилепился
еси, ангельскаго образа причаститися
сподобившися, сего ради песньми сицевыми тя
почитаем:

Радуйся, ангельским житием просиявый;
радуйся, воздержанием страсти угасивый.
Радуйся, греховныя стремления подвиги своими
поправый;
радуйся, на высоту добродетелей возшедый.
Радуйся, всякое искушение преоборовый;
радуйся, вся советы лукаваго молитвами твоими
разоривый.
Радуйся, светом Небесным нас просвещающий;
радуйся, огня геенскаго нас избавляющий.
Радуйся, отче наш Николо, светом святости нас
присно озаряющий.

Кондак 5

Божественным светом несозданным осияна
бысть душа твоя, отче всеблаженне, егда возшел
еси на высокую гору молитвы и на скрижалях
сердца Твоего начертал еси словеса Закона
Божия, егоже блюсти научал еси всех, да купно
с тобою воспоим и прославим Господа,
зовуще: Аллилуиа.

Икос 5

Видяще смирение твое и воспевающе подвиги
твоя, отче всеблаженне, яже восприял еси ради
служения безропотнаго братии Печерстей,
ублажаем Господа, силу Свою в немощи твоей
Совершившаго и сицевыми песньми похваляем

тя:

Радуйся, безропотное служение братии на себе
восприявый;

радуйся, образ послушания в себе самом
показавый.

Радуйся, труды и подвиги своими плоть
изнуриый.

Радуйся, течением слез источники страстей
установивый.

Радуйся, броней правды облеченый.

Радуйся, венцем целомудрия увенчанный.

Радуйся, в ризу смирения себе одеявый;

радуйся, порфирию добровольных нищеты душу
свою украсивый.

Радуйся, отче наш Николо, светом святости нас
присно озаряющий.

Кондак 6

Проповедуют холми пещерстии память подвигов
твоих, преподобне, сиими бо душу свою
украсивши яко одеждою всекрасною, возшел
еси на брак Агнчий во обители Небеснии, идеже
купно со всеми святыми песнь приносиши
Богу: Аллилуиа.

Икос 6

Возсиял еси светом святости твоея, яко
светильник всесветлый, не под спудом, но на

высокой свещнице Лавры Печерския
возженный, да просветиши сердца и умы всех,
во еже Бога славословити и тя, угодника Его
вседивнаго воспевати:

Радуйся, крест жития равноангельнаго от
Господа приявый;

радуйся, всему миру образ доброделания
явивый.

Радуйся, ко благочестию нас наставляющий;
радуйся, от всякия напасти нас избавляющий.

Радуйся, в молитве к Богу предстоятелю;
радуйся, Небесных благ всеславный раздаятелю.

Радуйся, обеты иноческия неврежденно
сохранивый;

радуйся, сладость молитвы в житии своем
вкусивый.

Радуйся, отче наш Николо, светом святости нас
присно озаряющий.

Кондак 7

Хотяще тя Человеколюбец Господь яко
всесветлое светило миру явити, не под спудом,
но на свещнице высокой постави, да на подвиги
твоя взирающе, научаемся добродетельному
житию подражати, греха же и скверны всякия
отвращатися, Господу выну работая и Сему
непрестанно молитву возносяще: Аллилуиа.

Икос 7

Новаго Соломона премудраго зрим тя, отче
преподобне, о порфире и скиптре яко о суете
сует мудрствующаго, и Единого Господа яко
сокровище многоценное в сердце своем имети
потщавшагося, сего ради прими похвалы
сицевыя:

Радуйся, Божественныя мудрости взыскавый;
радуйся, небеснаго знания возжелавый.

Радуйся, суемудрие отринувый;
радуйся, богомудрие возлюбивый.

Радуйся, Божиих дарований исполненный;
радуйся, благодатию Господнею осененный.

Радуйся, блистанием Истины осиянный,

Радуйся, огнем Божественным всеразженный.

Радуйся, отче наш Николо, светом святости нас
присно озаряющий.

Кондак 8

Странен мудрецам века сего явился подвиг твой,
преподобне, како отеческое достояние
отринувше, возжелал еси истиннаго сокровища -
Христа Сына Божия, и Сего обретше, всякое
земное стяжание во уметы вменил еси, Господа
воспевая: Аллилуиа.

Икос 8

Весь благодатию Божией одевся еси, яко светлую ризою и боготканною, отче наш преподобне, темже и власяница Твоя явися всем источник исцелений и чудес, сродником твоим ниспосылаемых. Сии поминающе, тя пением похвальным ублажаем:

Радуйся, молитвы кадило благоуханное;

радуйся, стено ограждения нерушимая;

Радуйтесь, чудес Христовых пучино неизмеримая,

Радуйтесь, милостей Господних реко неоскудная;

Радуйтесь, благодати кладезю неисчерпаемый,

Радуйтесь, даров Божиих источнике неистощимый.

Радуйся, непрестанно о всех молитвы приносящий;

радуйся, о память твою совершающих присно ходатайствующий.

Радуйся, отче наш Николо, светом святости нас присно озаряющий.

Кондак 9

Всякия избави нас напасти и скорби, отче наш богомудре Николо, ты бо присно предстоиши Престолу Божию и молишися о всех нас, память твою светло совершающих и ты в помощь и

заступление призывающих, непрестанно Богу
взывающе: Аллилуиа.

Икос 9

Витийствовал всеизрядно не усты, но дела
своими, подвиги бо твоими паче всякаго
наставника научил еси и хранением языка
твоего паче всякаго многословнаго
проповедника наставлял еси, во еже бегати
суеты мира, Господу же присно сужити, темже
тя яко учителя доброделей премудраго,
воспеваем сице:

Радуйся, Церкви Христовыя столпе
непоколебимый;
радуйся, Православия светильниче неугасимый.
Радуйся, наставниче наш благодатный;
радуйся, отче милостивый и кроткий.
Радуйся, души наша Словом Божиим
просветивый;
радуйся, сердца наша питием благочестия
напоивый.
Радуйся, светильниче, огнем добродетели
возженный;
радуйся, благодатию Христовою
преукрашенный.
Радуйся, отче наш Николо, светом святости нас
присно озаряющий.

Кондак 10

Спасение испроси всем и грехов разрешение, и болезней исцеление, и скорбей ослабу подаждь нам, отче преподобне, память твою верою совершающим, и о тебе пение Богу благодарственное приносящим: Аллилуиа.

Икос 10

Стена искушений обстоит нас, бед же и скорбей всяческих и напастей нашествие ополчается, ты же, отче святыи, молитвами твоими всякое злоухищрение вражие далече отжени от нас, память твою сице воспевающих:

Радуйся, молитвою своею нас укрепляющий;
радуйся, предстательством твоим от бед нас избавляющий.

Радуйся, любовью своею всех нас обымающий;
радуйся, никого же скорбящим оставляющий;
радуйся, врачу благодатный, телесем нашим здравие подающий;

радуйся, душам нашим спасение исходатайствующий.

Радуйся, огнем благодати сердца верных воспаляющий;

радуйся, пламень злобы адския тайнодейственно угащающий.

Радуйся, отче наш Николо, светом святости нас присно озаряющий.

Кондак 11

Пения наша похвальная и гласы молебныя приими, отче наш Николо, и предстательством твоим невредимы град и землю нашу сохрани, и молитвами твоими и нас чада Света быти сподоби, да с тобою песнь всерадостную поем: Аллилуиа.

Икос 11

Света сын и наследниче вечных благ явился еси, отче преподобне, подвигом бо добрым подвизался еси, течение скончал еси, веру соблюл еси, темже и сокровище нетленное благодати явился еси и ко Христу присно наставляеши нас, ти вопиющих:
Радуйся, Светом Невечерним озаренный;
радуйся, Славою Божиею просвещенный.
Радуйся, трапезою Небесною насыщенный;
радуйся, питием безсмертия напоенный.
Радуйся, Царствия Христова сонаследниче;
радуйся, вечныя Пасхи сопричастниче.
Радуйся, селений небесных преславно достигнувый;
радуйся, в чертозах пресветлых водворивыйся.
Радуйся, отче наш Николо, светом святости нас присно озаряющий.

Кондак 12

Благодати Божией источник неоскудеваемый
явишася всем верным мощи твоя честныя, отче
наш Николо, изливают бо токи исцелений и
помощь Небесную всем, с верою к тебе
прибегающим и тобою Господу молитву
приносящим: Аллилуиа.

Икос 12

Поюще Бога, Дивнаго во святых Своих, похвалы
всяческая приносим ти, отче наш Николо,
молитвенниче о нас усердный и заступниче наш
всечудный, и единым сердцем величаем тя,
глаголюще:

Радуйся, причастниче вечныя радости;
радуйся, приятелище Божественныя сладости.

Радуйся, правды дивное благоухание;
радуйся, святости чудное сияние.

Радуйся, преславное верных величание;
радуйся, православных крепкое упование;

Радуйся, равноангельское житие явивый;
радуйся, подвиги и чудеса своими землю нашу
просветивый.

Радуйся, отче наш Николо, светом святости нас
присно озаряющий.

Кондак 13

О, предивный угодниче Христов, преподобне
отче наш Николо, прими немощное пение сие
от любви нашея возсылаемое ти, и моли Господа
и Владыку всяческих избавити нас
душевреднаго прилога вражiego, да спасение
вечное улучивше, песнь с тобою боголепно
воспоим: Аллилуиа.

